

Dermaisiswa Pertapis kepada pelajar ITE dan madrasah

Badan anjur jalan kaki amal untuk pungut derma

Oleh **CHAIRUL FAHMY HUSSAINI**
chairul@sph.com.sg

PERSATUAN Taman Pengajian Islam Singapura (Pertapis) semalam mengumumkan tawaran dermaisiswa berjumlah \$40,000 kepada pelajar yang mengikuti pengajian sepenuh masa di madrasah dan Institut Pendidikan Teknikal (ITE).

Mendedahkan hal itu kepada *Berita Harian* semalam, Setiausaha Agung Pertapis, Encik Abdul Aziz Abdul Rahman, berkata tujuan utama pemberian bantuan kewangan itu adalah bagi membolehkan anak-anak daripada keluarga kurang berkemampuan melanjutkan pelajaran di ITE ataupun madrasah-madrasah setempat.

"Usaha ini dapat membantu mempersiapkan mereka mengharu-

ngi cabaran globalisasi dan membolehkan mereka kekal bersaing dalam sekitaran ekonomi yang pesat berubah.

"Dengan bantuan kewangan ini, Pertapis harap tidak ada anak-anak yang tertinggal dalam usaha menimba ilmu dan setiap daripada mereka berpeluang untuk cemerlang dalam bidang akademik," ujarnya.

Mendedahkan kriteria permohonan, Pertapis menyatakan antaranya pemohon mestilah seorang warga Singapura atau salah seorang ibu bapa mereka rakyat negara ini.

Pendapatan keluarga pemohon juga tidak boleh melebihi \$2,500 sebulan atau pendapatan per kapita tidak melebihi \$350 bagi setiap anggota keluarga.

Mereka yang belajar sepenuh masa di ITE atau madrasah berikut layak memohon:

- ▶ ITE College Central
- ▶ ITE College East
- ▶ ITE College West
- ▶ Madrasah Alsagoff Al-Arabiah

- ▶ Madrasah Aljunied Al-Islamiah
- ▶ Madrasah Al-Maarif Al-Islamiah
- ▶ Madrasah Al-Arabiah Al-Islamiah
- ▶ Madrasah Al-Irsyad Al-Islamiah
- ▶ Madrasah Wak Tanjong Al-Islamiah

Pelajar ITE yang berjaya dalam permohonan mereka akan menerima antara \$300 dengan \$400 setahun, sementara untuk peringkat madrasah pula, antara \$300 dengan \$500 setahun.

Borang permohonan boleh didapati di pejabat Pertapis di Blok 1, Joo Chiat Road # 04-1001, Joo Chiat Complex, Singapura 420001, atau dimuat turun melalui talian www.pertapis.org.sg mulai Isnin ini.

Bagi meningkatkan lagi keberkesanan mereka membantu golongan memerlukan, Pertapis akan mengadakan acara berjalan kaki amal pada 8.30 pagi Ahad ini di Kovan Hub, Hougang Street 21.

Dinamakan *Walkaton Amal Pertapis 2010*, ia adalah acara pungutan derma terbesar persatuan itu.

Wang yang diraih akan digunakan untuk mempertingkatkan suasana kehidupan dan sekitaran pembelajaran para penghuni Rumah Kanak-Kanak Pertapis yang berusia antara tiga dengan 14 tahun – 90 peratus penghuninya datang daripada keluarga pincang.

Sempena acara walkaton itu, Pertapis akan menerima sebuah van yang disumbangkan sebuah pertubuhan agama, San Wang Wu Tee.

Anggota Parlimen GRC Aljunied, Cik Cynthia Phua, adalah tetamu terhormat acara tersebut.